

論

語

詳

解

論語詳解卷四

郝敬解

里仁第四○禮樂本於仁故里仁次八節

子曰里仁爲美擇不處仁焉得去聲

此以下八章皆論仁此一章首明仁智合一卽孟子云仁人之安宅莫之禦而不仁是不智之意與下章不居不處皆以仁智并言凡篇中言仁多言智仁之明卽智智之公卽仁非二也里居也猶云安宅廣居人非至愚誰不擇居居莫美于仁操心制行以寬厚公平爲主安土敦仁故能愛不忮不求何不臧今舍

慈愛而尚刻薄去恬愉而競貪婪招尤取凶恆必由之是棄美就惡知擇處不能久處焉得智蓋仁智一心惟喪其宅而不知所以迷其往而不反擇善固執乃爲貴擇知及仁守乃爲真智仁者所以必智智者惟其能仁也

子曰不仁者不可以久處約不可以長處樂仁者安仁知者利仁

此因上章不知處仁者類記之與後章富貴貧賤不去意相通人世惟順逆兩境人心惟欲惡二念中有主則天定神朗逐境融通內外顯微無間仁智合一

之道也。此章所謂仁，卽表記云中心安仁。天下一人而已者，所謂不仁，非必私欲錮蔽私欲錮蔽者何待。久處此蓋君子而不仁者也。天理一息少間，外緣一絲未斷，則心境相持，存處未穩，行處卽礙。乍當約樂，猶或強勉，日久熏習，漸淪沒而不覺，神明未煥，道理生疎，豈能磨涅不磷，緇乎困窮曰約，豐亨曰樂。二者皆境，無私曰仁，不昧曰智。二者皆心，心無常境常，故心逐境遷，境不常，心常則心能齊境，心境未到渾然至一處，猶是捏抃之衷。主靜恬愉，惟有仁者是謂安仁。義理不到精融透徹處，猶是凝滯之見。神明通達。

言言解
惟有智者是謂利仁。智卽仁之覺。利卽安之用。居安則左右逢源。所行順理。利用安身。投之窮約。若終身納之豐亨。若固有所謂清明在躬。志氣如神。隨寓委順。動與天游。浮雲去來。何分久暫。本無欣厭。有何揀擇。坦然行乎無礙之途。與仁相宜。所謂安安而能遷也。故曰利仁。凡聖人言仁兼智。非智則冥頑。何以能仁。不仁則識情。何以稱智。聖學知行誠明合。中庸所以言顯微也。佛氏蹈襲安爲定。智爲慧。智慧破煩惱。卽仁智處約樂而儒者反不達。拘表記安利強爲三等。其實仁智無二。烏可淺深支離言也。

子曰惟仁者能好人能惡人

好惡二者干涉甚大斟酌甚微必有仁人萬物一體之公纖欲不蔽之明乃能用好惡仁者有好惡如天地有春秋舒慘榮枯無非生物之心自非仁者烏敢言好人惡人乎惟仁者無欲無畏渾然不見人我愛憎揀擇大虛無象而萬象妍媸洞照因物付物圓神不宰於人情極難察處獨能不億先覺於人情極易偏處獨能當可不遷蓋纔仁卽便智好惡本于智能處全在仁智惟分別仁乃無私故聖人不言智言仁仁者愛人智者知人此理易曉人徒知智者能好惡

不知唯仁者乃能好惡。徒知仁者好人。不知仁者兼
能惡人。有如姑息養奸。不能惡。卽是不能好。從井救
人。徒能好。亦是不能好。故知人愛人一理。未有仁而
不智者也。語勢稍重。能惡邊見仁必智也。承上言仁
智附記之。

能對所立主。我爲能對能爲所。大學之其所好樂之。
其所賤惡有所忿懣。有所好樂。逐物而流。故心不正。
此言能好能惡有主而定。故情不遷。好惡本同情。後
章好仁惡不仁者。不分人我。皆有秉彝。故曰未見力
不足。此好人惡人形骸。隔私意生。故唯仁者能之。

子曰苟志於仁矣無惡也

字如

志者心之精誠仁者心之本體聚會精神以復還本體邪妄之私自不能入前此積累之垢一洗方新後此不善之萌投閒無隙幽室張燈明來暗滅何惡之有

此章見仁爲善長志爲本立人惟一心心惟有志一生根蒂在于志雖聖人十五志學七十乃從心人不立志腐草無根志不在仁猶是鄉原疑似清濁之間耳能志於仁卽是心田上美種更無變出荆棘稂莠之理善惡從此攸分仁是善之極惡是不仁之極如

東西相背。冰炭不相入。向泰山頂上行。豈復墮落坑
塹。旣欲爲聖賢。必不至爲盜蹠。雖小過細愆。難保盡
無種子。旣眞。枝葉可漸養。然志於仁矣。纔得無惡。取
法乎上。僅得乎中。益信立志不可不專。躬行不可不
篤。

仁者寬裕溫柔。志立則明。作果毅。無濶畧包藏之病。
故仁資志以爲克。克已乃爲仁。剛則自無慾也。子云
志士仁人。無求生以害仁。仁人而不志士。則求生
害仁者或有之。無惡喫緊在志。苟誠也。專一之辭。卽
志也。猶苟日新。苟有用我。苟子之不欲。孟子云不欲

爲苟去之苟與設辭異

子曰富與貴是人之所欲也不以其道得之不處也貧與賤是人之所惡也不以其道得之不去也君子去仁惡鳥乎成名君子無終食之間違仁造次必於是顛沛必於是

此承前處約樂以下數章記君子以仁存心顯微無間之功仁惟一心心惟欲惡兩情爲己私惟順逆兩境爲外緣緣引之大惟富與貴澹泊可以怡性寡慾可以養心故貧賤者士之常士處貧賤馳情于富貴害心之大者聖學以境收心惟君子能安貧賤寡欲

養心仁之實也。去處兩境對勘。不處富貴。便是不去貧賤。君子而貧賤。是不以道得也。如顏子陋巷。終不
舍此趨彼。正其無欲無惡之衷。不去貧賤。卽是不去
仁。人所欲不取。人所惡不舍。似乎好名者所爲。人或
因是以名君子。而君子所以異於人者。以其存心也。
君子之心。惟知不去吾仁。豈有意于不去貧賤乎。如
大舜若終身固有。文王無畔援。歆羨稱天下一人而
已者。惟其中心安仁也。苟中無常主。情逐境遷。惡能
矯強固守。博輕富貴之名乎。信夫安仁利仁。非可僞
爲。蓋富貴貧賤客形也。無欲無惡。眞宰也。眞宰不固。

何以貞遇故仁不可色取名不可倖成君子依仁持
義之功不可須臾離也豈待富貴之交雖飲食亦人
之欲也飢渴當前則求飽喪志人莫不飲食而知味
者鮮君子存仁雖一飯不苟一舉箸不忘不敢以口
腹害心志養生之需猶若此而況他乎此猶在從容
時耳雖卒然造次之頃亦不以倉皇苟且去吾仁此
猶在平時耳雖患難顛沛之秋亦不以危急存亡去
吾仁如此乃真爲不去仁然後爲君子非道之富貴
何加焉

窮通得失士之大節聖賢所自試不過此涵養練習

有索非可以枯寂求也。以富貴貧賤爲程量。以造次顛沛爲閔試。方是內外合一。顯微無間之道。離境操心。遺事執理。偏枯之見也。君子不去之仁。天行不息。徹底全清。無毫髮習氣塵緣。可以投閒。故能終食無違。真宰凝固。擲撲不破。如精金良玉。不辭燒煉。方是真不去仁。造次猶草次。倉卒至前。卽莊生云。造適不及笑。獻笑不及排之意。顛沛僵仆也。詩云。顛沛之揭。如木倒根起。喻大難傾覆也。必於是卽不去仁也。大學謂定靜安慮止於至善。皆從艱險中磨煉。不向岑寂中躲閃。

坊記曰君子辭貴不辭賤辭富不辭貧則亂益亡富貴喪志貧賤養德故無驕易不怨難也學者有貧賤不移富貴不動之養乃能進德脩業故聖人每以兩境勘入非拂人情苟難以爲學也富貴以道脩天爵而人爵從也不以道小人而求利達也貧賤以道如驕淫亡身奢侈敗家所自取也不以道水火盜賊誤被刑戮無望災也

富貴貧賤之外飲食男女亦能喪志言食則該色非獨謂一飯之頃也終食造次顛沛君子而不仁者有矣去貧賤處富貴未有小人而仁者也視貧賤可惡

富貴可喜則私欲橫行何但終食之間耳論關節富貴貧賤爲大論功夫終食造次顛沛爲精有此工夫方能透此關節

表記子云無欲而好仁者無畏而惡不仁者天下一人而已矣仁惟一點無欲無畏之心欲惡加人則爲愛憎在己則爲忿慾情識變幻不過二種故君子改過遷善莫如懲忿窒慾顏子不違仁亦惟不遷怒不貳過易道所以損爲益也故下章卽以好惡言仁子曰我未見好仁者惡不仁者好仁者無以尚之惡不仁者其爲仁矣不使不仁者加乎其身有能一日用

力於仁矣乎。我未見力不足者。蓋有之矣。我未之見也。
聖學以仁爲宗。此篇自里仁以下八章皆言仁而有
次第。一章言人當處仁。二章言仁能處約樂。三章言
仁公好惡。四章言人當專心于仁。五章卽富貴貧賤
審好惡以存仁。此章卽好惡以見仁。愈約愈精。下章
并過失可觀仁。仁之變而通也。如此方爲盡仁。無媿
爲人而生死齊矣。故以朝聞道夕死終焉。

凡人情實不越好惡。而仁卽人心虛靈之本體。遇利
害得失。生愛憎喜怒。則虛靈之體昏迷放失。而違仁
遠矣。苟心境寧一。無欲無惡。則天真渾全。卽此是仁。

但人有此心誰無好惡好以仁惡以不仁猶之無好惡也如天地春生秋殺猶之無生殺也故天地聖人皆曰至仁恆人不能滅情又不能御情橫發無所底止故聖人卽人心靜虛之體以覺之謂我見世人多好未見好仁者我見世人多惡未見惡不仁者夫仁是生身立命之原誰不能好不仁是世上一切塵累妄緣誰不能惡而吾謂未見何也仁之真體廓然無物無可加尚故好仁與好外物異也好外物常欲其有好仁常欲其無無論有物卽無物矣而未忘無物之見猶是有加卽忘見矣而忘見之見未化猶是有

加直須見無所見化無可化方是無所加方謂無向
之好而渾然復靜虛之本體矣此可多見乎惡不仁
亦與惡外物異惡外物可包藏容忍雖少加身亦無
傷若不仁妨吾天性耳目口鼻一被聲色貨利七情
沾染則元神受其薄蝕既惡不仁所爲必仁矣於不
仁絕之若毒藥猛獸不使加身掃蕩廓清則纖塵不
留而粹然完美矣此可多見邪有此惡方能保護此
好有此好自能銷煞此惡有此好惡便是無欲無畏
之仁人顧今安得見之要亦非難也仁卽我之心覺
卽我之力昏惰不覺便是不用力任好惡兩情紛馳

末向仁不仁上體究虛靈中情識日增軀殼上牽累
日重以至仁愈遠不仁愈集此輩皆託言當仁難而
力不足不知志嚙于因循過成于等待誠有人馬能
于一日之間天機覺悟如夢乍醒收拾放心天靈一
開卽豁然見無尚之真體生平加身之不仁如炎爐
炙雪俄頃頓消此事原不假力何不足之有乎何好
仁惡不仁之難見乎蓋別樣好惡幾非在我或憂力
不足好仁惡不仁在我一念耳此心源上事不落形
像不著見聞自家天機運轉隱微獨覺把似與人
不得人亦窺視不得難謂世上無一日用力之人特我

未見耳豈以我未見而謂世無此人乎終不敢絕望
于天下也與已矣乎吾未見語意相友

或問好仁是好自己之仁或是好他人之仁孟子曰纔
問自己他人卽是有以尚之子云我欲仁斯仁至矣
無以尚者心上不添一物不使加身者非禮勿視聽
言動也無以尚之卽如好好色不使加身卽如惡惡
臭心境通融內外合一

子曰人之過也各於其黨觀過斯知仁矣

天下皆知以仁觀仁而不知過可以觀仁過非美行
然致過不同有由黨致者黨親也偏也卽君子亦黨

乎之黨大道無偏而入各親其親則各於其黨黨之言當也各於其黨非阿附明比爲黨也如周公誤使管叔爲人弟者各於其兄也夫子諱魯昭公爲人臣者各於其君也非他人之兄他人之君我誤使我諱之也心本無過而其迹偶窮因其迹之違益信其心之厚過雖難辭仁益可見視彼假仁者周旋形迹惟務自求以至證父爲直避兄離母爲廉自謂無過視君子之有過用心厚薄何啻天壤觀仁至此心術益純而嫌疑不足以間之非大聖賢不及此古人名誼之際難處則引爲已過蓋天理人情窮則必變子

云與仁同功其仁未可知與仁同過然後其仁可知
處功則從容易揜處過則迫切見真管仲之仁以功
見也湯武之仁以過顯也此觀仁之最精也故繼好
仁無尚之後此章宜引陳司敗問昭公章參證夫子
作春秋無毀譽云知我罪我皆此意也

子曰朝聞道夕死可矣

人所以貴于萬物者惟其虛靈洞達義理得于心也
生不聞道久住人世竟成辜負聞道雖朝生夕死何
害蓋旣聞道則生死齊乘運去來無適不可不聞道
則神明無主情識牽絳怖死每生無所不至矣百年

物陳四十五十無聞與草木俱腐苟一夕尚存猶是
覺路三年之病求七年之艾惟日不足死而後已可
也

聞道卽易所謂通乎晝夜之道而知上智頓悟中人
漸覺從前癡迷已非一朝長夜初醒千古大快是曰
朝聞然不曰行而曰聞者知體無迹有可見可行卽
同未聞卽不能通晝夜不能齊生死聖人于至處每
擬知佛氏蹈襲此意而偏用之詳于死畧于生弊不
可言害亦不可言聖人不語死未嘗輕言人死蓋人
生任重一毫未盡卽是枉死千秋事業只在一息未

絕以前百年卒成之功一死都休故死事甚大可死
甚難佛氏惟勸人死去所以異于聖人

子曰士志於道而恥惡衣惡食者未足與議也

志於道與志於仁殊仁者道有諸已故志仁則無惡
志道尚泛然未得故或有恥惡衣食者好美服食常
情紛華之習似無緊要實是貪富貴利達種子子路
衣敝緼袍聖人亟加稱賞不求安飽便謂好學就毫
釐幾微察見全體肝腸此等人慾深累重何足與議
議與言殊言者直陳議者諳確卑陋如此所見必差
子曰君子之於天下也無適的也無莫也義之與比推

君子之於天下一語便可悟道不著事不著物不著理空空洞洞是曰天下天者自然也天下者大虛也易曰天下何思何慮無思也無爲也感而遂通天下之故此之謂也專主曰適不肯曰莫適主于可莫主于不可兩種見解皆虛中礙像一絲礙便不成比比附麗也義宜也時中也其幾圓其應順詩云克順克己如火就燥水流濕易云精義入神以致用也性體清虛自在而妄生取舍分別卽與性體乖聖人取舍無取舍分別無分別不識不知順帝之則文王也從心所欲無可無不可孔子也佛氏蹈襲此意云無所

住而生其心似矣然毀形滅倫厭世界爲蘊濁惡人
事爲煩惱披剃入山爲脩行義乎不義乎併其所謂
無住非也

子曰君子懷德小人懷土君子懷刑小人懷惠

懷者深相戀慕拌棄不下之意懷德者義理悅心遷
善改過孳孳敏德無宴安怠惰之氣與懷土相反術
家以意爲土禪家謂之窠臼惟意所便遂受沈沒耳
目口鼻安頓在聲色臭味裏更不思出脫不肯徙義
遷善求安飽而已矣刑法也刑法所以糾不率君子
無麗刑之事而常懷守法之心詩云溫溫恭人如集

于木惴惴小心如臨于谷又云謂天蓋高不敢不局
謂地蓋厚不敢不踏皆懷刑之意先王五刑之屬三
千褻世禁網愈密士欲身心毫無干犯亦自未易君
子不肯行險僥倖以刑法自律自脩惟日兢兢業業
謂之懷刑可也小人無兢業之懷日惟營營逐逐徼
寵乞憐其邪媚之情狀與君子嚴正之氣象迥別懷
德者寬和居仁之心也懷刑者嚴敬由義之心也懷
土者適已自便也懷惠者趨利徇人也

說文土者吐生萬物也二象陰陽一象物生出故陰
陽之中氣爲土物莫不戀其所生君子非無土而總

卽是土素位敦仁豈敢懷居威曰刑恩曰惠兩者皆操之自上君子畏大人不援上何敢望惠小人奔走權勢抑大人以求親媚耳祥刑曰五刑之屬三千墨罰之屬千劓罰之屬千剕罰之屬五百宮罰之屬三百大辟之罰其屬二百三代以後刑名益增多于秋荼密如凝脂士君子能以衰世之法自脩省則秋毫無遺憾矣豈直畏刑已邪

子曰放於利而行多怨

躬行曰行君子行本乎道義放於利者爲名利而爲善也放依倣也真正爲利者如農工商賈輩與世交

易人求怨之若身爲名節道義而有所依附貪圖既思保全名節又思占討便宜世間豈有富貴利達之廉士豈有全身肥家之烈士計較千端機械百出我之掩襲雖巧人之窺瞰亦深天下以道義責我則舉生平盡喪天下亦以利與我爭則所做者亦終必失人惡我我亦惡人往來憂戚之場怨天尤人終無了日蓋既逐逐營營自然愁多恨多奚俟害人而人始怨乎惟有光明正直之君子無入而不自得焉

子曰能以禮讓爲國乎何有不能以禮讓爲國如禮何禮讓猶云仁愛禮則自讓曲禮云退讓以明禮無禮

則不讓。不讓則廢禮。非有二也。世教民風全仗之分
管攝。所以調護維持其間者。有禮以相讓也。厥初生
民。禮教未興。弱肉強食。無異禽獸。聖人制禮教民。讓
以變其亢悍之習。銷其貪鄙之私。然後三綱正。五常
敘。人心和。天下安。末世禮讓之文雖在。禮讓之實無
存。諸侯僭天子。大夫僭諸侯。陪臣僭大夫。傲狠陵暴。
無復謙恭巽順之意。大亂遂成矣。以此論禮。不君不
臣。不父不子。所謂斯須不可去身者。且無如之何。況
可以爲國乎。

書誦堯德。首稱克讓。易惟謙亨。有終。謙卽讓也。堯舜

能讓故九官十二牧皆讓文王以服事殷故耕者讓
畔行者讓路虞芮向化泰伯讓而周興伯夷叔齊讓
而頑廉懦立故不伐者聖賢之大美好上者小人之
惡行民之所以和下之所以順功之所以成名之所
以立皆在乎讓故大學云一家讓一國興讓讓則爭
何由起亂何由生不費更張上下辨而民志定風俗
移治國如運掌矣故曰何有不讓則必爭爭則必亂
臣弑其君子弑其父事至此于國已矣其如禮何聖
人愛禮重于愛國傷世而發此言也

子曰不患無位患所以立不患莫已知求爲可知也

患者憂思預備之意。患所不當患。當患而不患。誤用其心。學之大惑也。人已分段。明則用志不分。用志不分。則計定而備周。今人皆患無位。患人不知已。夫位在人者也。所以立位在我者也。知在人者也可以知在我者也。人有位而無賢。有賢而不知人之事也。人當自患立人之位。必思稱職。受人之知。必求無負我之事也。我當預謀。今棄其在我者。不患取其在人患之舍已之田。芸人之田。倒見如此。學廢業荒。位亦終不得人。亦終不知。是謂兩喪。

列爵曰位。相信曰知。士雖不在位。亦有知己。君子不

苦于無位而苦于無知己故乾九二遯世无悶無位也不見是而无悶無知己也惟不相知故不見是

子曰參

參本材二音

乎吾道一以貫之曾子曰唯

偉

子出門人

問曰何謂也曾子曰夫子之道忠恕而已矣

曾子平日篤志力行如省身之勤戰兢之守容貌辭氣顏色之儉隨時隨處操存不懈而心境未一

事理未融艱難勤苦夫子嘗謂參也魯乃呼而醒之

曰吾道一以貫之一者大虛無物之名大虛無物而

萬物森羅故曰維天之命於穆不已四時行焉百物

生焉是天道一以貫之也人心卽大虛聖人寂然不

通不行而至不疾而速是聖道一以貫之
也學者日用操存勉強行道已所不願勿施於人自
內及外由微達顯安勉不同亦是一以貫之也夫道
散則萬殊本惟一心逐萬而求事物無窮得一以貫
惟心爲主虛極靜篤隨感順應脉絡貫通顯微無間
道之全體大用然也當是時曾子體驗功深機緣欲
達倏聞聖訓恍覺道爲易簡疇昔之艱難頓釋不復
遲疑不暇措語直應之曰唯不諾而唯者諾徐唯疾
也時諸弟子在側見夫子獨呼曾子知非泛與不敢
直請又見曾子不言而唯諒有獨得故子出是問曾

子此疑甚善。惟有此疑，故有隨事體驗之功。無執理遺事之僻。他日下學而上達，得力正在于此。其疑奈何？彼謂文行忠信，夫子之教；博文約禮，夫子之教。多見多聞，夫子之教。旣曰文曰行曰博曰多，今何又云一以貫？曾子欲深明外內一原顯微無間之旨，而彼功力未到，徒費口耳。乃就學者旧用規矩開示，使由此而行，自然脗合。中心曰忠，如心曰恕。夫子每以此教學者，已私未破，形骸間隔。但忠以盡心，恕以行忠，則自然破除而真意流通。此卽學者之一貫也。程夫子從心所欲，無行勉強，而其由中達外，由已及物，亦

卽夫子之忠恕也。非有二道。諸子未能一貫。但行忠恕而已矣者。無他之辭解者。謂一貫爲上達。其實一貫便是下學。纔有一卽非一。纔一貫卽非一貫。大道無言默而識之。曾子一唯。誠哉知言。顏淵如愚。所以卓爾之。卽指道貫無所貫。故但曰之。

一猶獨也。無對曰獨。無偶曰一。凡數有一必偶。眞一無一。得一無象。言一者。無象之象也。聖人以象示無象。不得不言一。兩儀三才四象五行萬事萬物皆由一生。一散爲萬。萬不離一。故曰一貫。伏羲作易畫卦以窮三才之變。始畫奇卽一也。究竟六十四卦三百

八十四爻皆不離一而範圍天地曲成萬物還歸于一全部周易卽是一貫圖說

易曰一陰一陽之謂道又曰參天兩地而倚數卽一以貫之也數者道之節目一者數之元神易所以窮神知化者數爲之紀道與數非二也大初无一一分卽兩兩參卽五參伍卽九卦成于三位奠于五用極于九而皆同于一一者大極大極者人心也人心死則易不可見故大衍五十而虛一筮法掛一以象三三謂三才一謂人人在天地間卽大極在兩儀中故曰人能弘道待其人而後行道書云天心人也知易

者乃可與言一貫

一者不二也中庸曰不二故不測張子厚謂一故神
如人四體百骸八萬四千毛孔總之一氣處處疼癢
相關所謂寂然不動感而遂通一以貫之也道惟一
貫則凡知行上下顯微費隱體用精粗理氣才德等
說皆成破裂皆是刺語四教兩端爲下學上達而已
○一是何物如大學止至善知止定靜安則一矣能
慮能得則以貫矣明德爲一明明德於天下則以貫
知爲一致知而格物則以貫得一則萬畢老子云天
得一以清地得一以寧侯王得一以爲天下貞有一

以貫則萬物皆齊泰山非大秋毫非小無一以貫方寸地荆棘桎冰炭水火矛盾變態煩亂而不可理故聖心純一

曾子子貢皆聞一貫子貢年長于曾子十有六歲聞宜在先而領畧不如曾子曾子朴實子貢浮華曾子力行子貢多識力行有實得朴實近自然故凡聖門真聞道者皆是真能行道者也一貫非聖人秘傳諸弟子非必盡乍聞性與天道夫子非不言子貢歎不得聞者聞而如無所聞耳漆雕開謂吾斯未信知行合乃爲信若曾子唯一

或問未唯以前何如既唯以後何如未唯時向外馬
求既唯始信不遠未唯前逐外遺內守內遺外既唯
後內外通融未唯前聞及信不及知及行不及既唯
後實證實悟始信一貫然夫子不樂以語二三子何
也未能下學驟語上達必有執理遺事之病其語曾
子子貢又何也既能下學不語上達非究竟之旨與
凡民由之等耳然上達未假言傳功力不到機會不
投終成畫餅所以聖學知卽是行誠卽是明默而成
之不言而信不似後儒下學上達只作言語傳述耳
○程伯淳謂盡已爲忠推已爲恕程正叔謂發已自

盡爲忠推已及人爲恕註疏謂忠盡中心恕忖己度物三說皆依欲惡解其實忠恕不但欲惡一切應事接物真心直達中間無容轉換遮蔽皆是忠恕忠以中心爲字恕以如心爲字如心如忠心也忠心已心也內如已心然後外如人心故恕根于忠非牽人合已之謂若以欲惡解註疏忖己度物爲確形雖有人已忖度皆已心如云推已及人爲恕則是恕合人與已兩心而成大學云藏身恕說不去矣忠恕有案勉有合言者有分言者合言則恕卽如忠以達中開無容等待何待忖度卽大學誠意勿自欺夫子一貫之

忠恕應事接物皆是以施于欲惡卽欲立立人欲達
達人仁者之自然也若分言之單提恕卽註疏所謂
付已度物不欲勿施中間容少推勘夫子告子貢綏
身可行強恕求仁之事也然安勉殊而其歸同推勘
久私意盡人我忘亦便是一貫矣一貫之忠恕卽四
教之忠信信實其心而無偽恕如其心而不變同也
聖人教學者以欲惡行恕于恆情最切而下學易近
取耳非謂忠恕專主欲惡欲惡便足了忠恕也無欲
無惡方是真忠恕

主忠信聖門以此立教忠信傳習曾子平日以此三

皆故當時印證得如此的確向門人說得如此快便
主忠信則自一矣一則自貲矣畧示道體非細論工
夫忠恕容得工夫道容不得工夫若說推己及人付
已度物拖泥帶水非當日語意曾子語意渾淪正恐
門人尚未會得

子曰君子喻於義小人喻於利

喻如四體不言而喻之喻淪肌浹髓方謂之喻與懷
德懷土之懷皆君子小人之精神命脉也義利雖殊
爲喻則同君子以小入謀利之心謀義故精義入神
小人用君子謀義之心謀利故算析錙銖心術因人

品異人品由心術分非天生便是君子小人便各有
所喻也陸子靜謂所喻由所習所習由所志志在此
則所習在此所喻亦在此矣

喻字从口俞聲俞然也心所同曰然心中愉悅開口
便道著所以自喻喻諸人者津津不離口由其習實
成自然如履適足如磁石遇鐵莫知其然而然是名
曰喻

子曰見賢思齊焉見不賢而內自省也

聖言畧重內省思齊之功泛而緩內省之志嚴而切
見賢思齊人有秉彝不賢自省吾見亦罕矣尋常交

遊誦詩讀書能如此行持何須師友自然日進無疆
何暇復攻人之惡何至嫉賢妬能悅不若已

子曰事父母幾平諫見志不從又敬不違勞而不怨

幾者動之微諫諍言也幾諫者隱約不敢顯露乘便
不敢直遂如是諫則必從見志不從者不待發言徵
色見幾也蓋子能幾諫親未遂顯拒但微覺志有不
從仍小心敬慎浸漸轉移勿少違拂如此則親必從
又或不從而以煩瀆見怒加子以勞苦之事亦惟負
罪引慝依依膝下終無怨悔猶之幾諫敬不違也如
是則雖至頑之親有不底豫乎孝子難處在末著初

諫永誓無怨非逐次捥揆也至于勞而不怨自無不
格之親勞病苦也怨自悔也非怨父母

易曰知幾其神乎唯幾也故能成天下之務務就有
大干事君事親者諫者臣所以事君孟子云政不足
諫唯大人爲能格君心之非格心者幾之謂也相幾
開導不在口舌形迹彰君之過而君自遷改此爲幾
諫非以言諫也惟大人地分親切朝夕漸摩乃能格
心若小臣疎遠忠懷無由上達全仗口舌故諫者小
臣之事人子於父母膝下一體至戚呼吸相通正宜
用幾而不知幾嗾嗾忤親是子之罪也虞書云烝烝

父不格姦舜所以致底豫爲大孝惟其幾也君親本
同道故聖人發此論家語子云忠臣之諫君有五義
一曰諂諫二曰慤諫三曰降諫四曰直諫五曰諷諫
度主而行之吾從其諷諫乎諷諫亦幾諫也

子曰父母在不遠遊遊必有方

親在不遠遊孺子之慕大孝終身之心也親在無事
漫然遠遊是忘親也然父母始生男子桑弧蓬矢射
四方期以事君治民出使經營豈欲老之牖下乎故
或以君命奪情或以親命起家不得不遠遊而父母
在念子將奈何是必使父母常知己遊之所在而後

可故遊必有方也。朱註云：遠遊則去親遠而爲日久，定省曠而音問疎，不惟已思親不置，亦恐親念我不忘。有方則親知己所在而無憂，召已則必至而無失也。又云：如已告之東，卽不敢更適西。此語未然。夫遠遊焉有定在？惟孝子音問不絕，常使父母知子所在，則其心安矣。此章事甚淺近而極懇至，遠遊如此承歡膝下何如？

子曰：三年無改於父之道，可謂孝矣。

解見首篇

子曰：父母之年，不可不知也。一則以喜，一則以懼。

人自少及壯至老時序密移。外人數年一見。驚看老
大。家人朝夕相守。泯然不覺。故子在父母膝下。熟慣
日復一日。恰似常爾。不思父母之年。去日漸多。來日
漸少。爲人子者。何可不知。知者。記筭思忖也。一喜一
懼。由記筭思忖生。思今年增一筭。爲之一喜。思親年
又減一筭。爲之一憂。曾子云。往而不可還者。親也。至
而不可加者。年也。孝子欲養而親不待也。椎牛而祭
墓。不如雞豚。逮親存也。家語丘吾子曰。樹欲靜而風
不停。子欲養而親不待。往而不來者。年也。不可再見
者。親也。楊子云。不可得而久者。事親之謂也。如此記

算思忖則生前之一日卽死後之千年凡可承順奉養惟日不足焉可不記算思忖也

一喜一憂方謂之知凡聖人所謂知非徒知之此與上章論人子事親言愈緩而情愈切

子曰古者言之不出恥躬之不逮也

古時風氣醇厚浮華未滋誠一之真凝結未散故其人多朴茂而少枝葉一言苟浮于行束自羞媿非強閉之自若有所慙愧而不出者逮追及也口言十分身止行九分便是身不逮口不逮且恥況全不顧今人未行一分已言十分惟其無恥所以便便古人言

纂今人言多古人言可信今人言不足信也

言莫詳于古人非道之言自是絕口誨人未免于言
無諸已喻諸人內省能無歉乎古人惟不昧此心所
以併善言亦不輕出言不輕出而躬行益敏行益敏
而古人言可爲法矣易曰脩辭立其誠所以居業也
六經之言古人業之所居論語二十篇皆夫子躬行
之言故百世之下誦其言見其行古人所以不可及
子曰以約失之者鮮矣

朱註云不侈然以自放謂之約凡事約則鮮失老子
云治人事天莫如嗇卽此意也大受之器縱橫豁達

不羈之才。左右逢源。此惟養盛然後可幾。苟無君
之時中。必爲小人之無忌憚。而其失轉多。寧收斂省
約。雖張飾不足。尤悔必少。卽與其不遜也。寧固
之意。大抵天下事。知足則不愛。知止則不辱。欲寡則
易。遂求少則易得。後則能先謙。則能尊嘿。則足以容
忍。則乃有濟。慮少則心清。用儉則財足。簡出則事少。
寡交則身安。約之一字。無處不宜。雖非中庸至德。可
以無大過矣。甚至天地之道。易簡而已。學問之道。求
放心而已。收視反聽。蔽明塞聰。退藏於密。約之以禮。
又何但鮮失耳。

子曰君子欲訥

落

於言而敏於行

言行皆心也言易輕行易惰二病相乘輕則未有不
惰者其機不在言行在心欲者心之志志欲訥於言
所以矯其輕也敏於行所以警其惰也言訥則義理
含蓄而脩爲有力行敏則精專一而浮華日銷故
君子欲緘嘿沈靜養吾精明果敢之氣則言行簡而
德業成矣

子曰德不孤必有鄰

天下唯有不善之人所入皆窮出門卽礙庸庸爲胡
越親戚如路人爲善之人雖在深山窮谷離羣索居

人人向往近而不厭遠而益親士務脩德耳勿以行
不儕俗孤立爲疑也人面不同好善一念脉脉相親
舜所居一年成聚三年成都孔子居出布衣三千七
十士從之如雲此不孤之大者其次鄉國善士以至
一介皆有密友水流濕火就燥莫知其然然鄰老
聲應氣求相友相助之意非必比屋連舍也

子游曰事君數

朔

斯辱矣朋友數斯疏矣

數有再三重複意有細鑽輕忽意有造次急遽意又
有虛浮誇誕意有狂誕侮慢意言行交際皆有之威
儀動作皆可見不獨諫諍一端耳不持重不見幾竭

人之忠盡入之情恣已不量人故有此等氣習以之事君由斯取辱以之交友由斯見疏不然者君何至辱其臣朋友何至疏其友乎故君子知幾慎重爲貴

論語詳解卷五

郝敬解

公冶長第五○里仁莫如親賢此篇多論人物故次之

子謂公冶長可妻也去聲雖在縲雷縲之中非其罪也以其子妻之子謂南容邦有道不廢邦無道免於刑戮以其兄之子妻之

大道不離日用涉世無礙學問之實際也公冶長南容二子敦厚周慎元吉之士夫子皆謂其足以保身宜家皆以女妻之或疑長曾在縲縲中然此乃非望

之災。君子論人以實。雖遭困辱。罪非自取。其所爲保身宜家者。自無損也。何害其爲可妻。縲纁同。纁。繼同。拘係也。罪囚則拘係之。長在縲纁。是妻以後事。非因縲繼無罪始妻也。南容謹言。觀三復白圭。與論禹稷羿夏。其慎密可知。以此處治亂。自無不宜。治世卽不必顯庸。而可免廢棄。亂世則必能保身。而刑戮不及。意重處亂。蓋處治易。處亂難也。恒人以免刑戮爲常事。聖賢視爲切務。蓋乾惕之心。惟恐近刑。猶公治長。非縲纁爲罪。惟求在已。無可以縲纁者耳。詩云。溫溫恭人。如集于木。惴惴小心。如臨于谷。戰戰兢兢。如履

薄冰曾子所以將死而啓手足也

公冶姓長名字子長孔子弟子魯人或云齊人能辨鳥語有雀鳴如云車覆粟相共豕驗之果然又有雀集舍鳴如云虎馱羊往果得羊亡者迹之訟于公白其故不信遂被縲紲雀復集獄舍呼如云齊人侵我疆沂水上澤山旁長介獄吏以聞往迹之果遇齊師迎擊大勝魯君釋長欲爵之長恥以禽語得祿不受後遂廢其學按此事本怪誕而左傳稱介葛盧辨牛鳴周禮夏官夷隸掌與鳥言貉隸掌與獸言蓋古有是學鳥獸有情自宜有語如夷狄異種缺舌今之譯

史亦辨鳥語之類弟子解云長能忍恥辱亦爲與鳥
獸言本隸事故轉相附會耳

南容孔子弟子名縉卽南宮适或作括字子容索隱
云魯大夫孟僖子之子仲孫說也一作閱居南宮因
氏焉諡敬叔孟懿子之兄其父僖子將死屬說與其
弟何忌同事仲尼何忌卽懿子說卽南容是一人而
四五名也禮記檀弓云南宮縉之妻之姑喪夫子
之壻姪女有姑喪故教之作髻則南容卽南宮縉信
也而有子云南宮敬叔反載寶而朝子曰若是其貨
也喪不如速貧之爲愈大夫去立載貨還朝有市心

焉。孟子所謂賤丈夫壟斷之行，豈謹言尚德如南容者而爲此？至與桓魋同詬，胡一人而賢否相去之遠乎？然則敬叔乃與夫子同適周，問禮于老聃者，與南容蓋兩人。武王亂，臣十人中亦有南宮适，蓋三人索隱誤也。

子謂子賤君子哉。若人，魯無君子者，斯焉取斯。

子賤爲單父宰，親賢自輔，不下堂而單父治。故夫子賢之。蓋美質係乎薰陶，德業資于輔養，樂善不倦，休休有容，則人自樂告以善，脩己治人，並受其益。故曰：君子然，天下亦有多賢之地而無知己者，亦有好賢

之志而不得其人者。故地與人兩相遇難也。子賤宰一邑而父兄師友事者至二十有四人亦多君子矣。固斯人好賢而又生多賢之邦。乃能相與有成。斯地之幸亦斯人之幸也。兩斯字疊上兩君子。謂魯若無君子。此子賤君子何所取此衆君子乎。聖言委蛇非徒贊魯多賢實喜子賤親賢取友之多耳。宰一邑而所得士如虞廷之數。苟非生多賢之邦。烏足以供其求深喜之之辭。

子賤孔子弟子。姓宓名不齊。少孔子四十九歲。或云三十歲。宓一作處。與伏通。伏虔作服虔。古服處宓伏。

四字通用○子賤初爲單父宰冠蓋迎者交于道子
賤曰驅之所謂陽喬者也喬作鰲魚名不釣而自至
荀子謂浮陽之魚莊子謂鯨魚水面白鰈小魚也喻
士不招而自來者旣至單父請于耆老尊賢者與共
理而單父大治孔子問何施得此對曰不齊所父事
者三人所兄事者五人所友事者十一人孔子曰可
以教孝弟舉善矣未足也對曰有賢于不齊者五人
教不齊所以治不齊事之而稟度焉孔子嘆曰其大
者乃如此惜哉所治者小所治大則庶幾矣

子貢問曰賜也何如子曰女汝器也曰何器也曰瑚璉

年上也
聲也

子貢之問方人之見也朱子謂因夫子稱子賤而問
無据子賤年少後進夫子以君子稱之子貢材望不
啻過之夫子僅許其爲器蓋英華炫露不若德性淵
涵方人好勝不如舍己冲虛也故記者類記之器適
用之名瑚璉宗廟盛黍稷之器飾以金玉簠簋之屬
明堂位云有虞氏之兩敦夏后氏之四璉殷之六瑚
周之八簋是也不舉日用常供而舉清廟重器謂通
達之材可以興禮樂華邦國也不舉當代簠簋而舉
先代瑚璉謂爲今人所貴亦古人所珍也然宗器

重釜甑耒耜尤前民之急金玉雖貴陶匏竹木皆有
用之材可貴而不可賤宜于宗廟而不宜于退處子
貢所不足亦可知矣

或曰雍也仁而不佞

甯从仁从女

子曰焉用佞禦人以口給

屢

問

憎於人不知其仁焉用佞

佞者便利之名俗稱口才游士說客思如涌泉辯如
懸河自是一種才華然以之脩德不如木訥仲弓天
資恭嘿本近仁之資或人卽以當仁非也惜其不佞
尤非也夫子難與論仁但辨佞不可有禦人口給正
佞人情狀所以稱才惟此所以害事亦惟此禦猶敵

也給捷也。以口敵人。祇取捷疾。不由衷。不顧理。心知其非。而但以取勝。人明知其非。而屈于其口。亂德害政。往往取憎于君子。焉用此爲。若夫仁。必德性粹美。學問精密。天理渾全。元氣周流。內外顯微。始終無間。乃可爲仁。雖顏子祇許三月不違中人。進德全倚問學。造詣功深。然後德性渾化。故子云。十室之邑。必有忠信。不如丘好學。仲弓質美。而學未純。必如夫子所告。敬恕交脩。家邦無怨。乃可幾耳。

或人意不在仁。但病仲弓不佞。夫子雖不許仲弓仁。特喜其不佞。衰世尚浮華。以佞爲才。自歎無才。則曰。

不佞祝鮀之佞惟以其爲才也故使之治宗廟臯鼬
之會長衛于蔡者佞之才也佞字从女信聲女不成
信曰佞諂媚悅世俗人喜之正人惡之屢者非一
人一事言憎所以折或人之好也

仲弓孔子弟子姓冉名雍冉伯牛冉有之族魯人少
孔子二十九歲子貢曰在貧如客使其臣如借不遷
怒不深怨不錄舊罪是冉雍之行也

子使漆雕開仕對曰吾斯之未能信子說

貌

士君子苟存心天下隨材效用皆有所濟此夫子使
漆雕開之意若論道無盡學無盡道未徹悟學未大

成凡所注厯皆屬嘗試此又開辭夫子之意二意不相礙如由求輩皆仕開才未必不如彼其志獨超然深詣故夫子喜之吾斯引而不發不下帶而存也信嘿契也與忠信之信人而無信之信本同學徵於信信則一不信則疑疑則二但有絲毫疑卽是未一卽未能信人誰不欲爲聖賢苦被小體遮蔽塵緣障隔雖勉強假合未能徹底通透卽涉疑似事理不得歸一心境不得圓融人我不得破除利害不得兩忘是非不得渾化皆爲不信夫子方與開說事功開轉向心性理會夫子所以悅若是由求輩且共謫說政事

耳

吾斯猶俗言者個觸目皆存。陸子靜云。家常茶飯老子云。可名非常名。若更言斯道斯理。便是頭上安頭。吾對人言。在己昏昏。焉能使人昭昭。痛癢惟自知。故曰。信雖師。何能知弟子。其言甚確。夫子卒無以強之。而更喜之。

自古惟堯舜事業徹底。是德性發揮。夫子謂爲政以德。脩己安百姓。中庸謂篤恭而天下平。大學謂誠意正心而後國治天下平。皆信也。至如中人作用。因材器使。隨分勉強。各能有所建立。甚者如五霸之功業。

管晏之學術當時亦頗烜赫君子皆謂假之自古吾斯能信者幾人被開一字勘破聖學無影響記聞之知真知卽是真能知而不能皆謂之假不似後儒單提致知爲入門也

漆雕姓開名字子開孔子弟子魯人少孔子十一歲家語云蔡人字子若

子曰道不行乘桴敷浮於海從我者其由與子路聞之喜子曰由也好勇過我無所取材

聖人不得以道易天下又不忍目擊天下無道於是有出世之思欲置此無道之世于不見不聞而遠浮

于海亦憂時之寓言耳二三子唯子路憤世嫉俗如
愠見于陳不悅于公山佛肸之往其素志也故夫子
許其從行子路聞而喜自是雲霄一羽氣槩非真喜
浮海喜夫子無道而隱已得與同志也故夫子詫其
果決而稱其好勇過我以微諷之已而戲之曰若是
則成行矣但無所取梓材耳與牛刀之戲相似
聖門惟子路直諒聖衷隱曲多所撻發如見南子往
公山佛肸莫匪乘桴喜與不悅莫匪知己子云自吾
有出惡言不至於耳死則云天祝予以此

此章摹寫聖人言語氣象如生宜作鏡花水月看論

語多有此等意思。道不行。不行于四海之內也。舉世傾危。率土之濱。無地著足。除是絕跡入境。如海水之洋。無人之處。乃可自託。然非將不可往。獨行又不可與他人往。又不能除是由。乃可耳。此聖人寓言。卽鳥獸不可與同羣。吾非斯人之徒。而誰與之意。子路自知浮海設言。而喜夫子獨與已。覺平日愠見不悅。有當聖心者。故夫子微諷諭之。未嘗重詆子路。亦畧以明絕世之終不可。而由欣然果確。是能爲聖人所不忍爲者矣。過字微箴其病。我字微露其真。聖人妙語從容。不迫此句。氣畧斷。夫由旣喜。則此行決矣。但作

桴無處取材耳。桴，編竹木爲之。一名桴，一名筏。材，卽竹木無所無處所也。無材，則桴不成。無桴，則海亦終難浮矣。意在言外。舊註謂不能裁，反義，正非是。

孟武伯問子路仁乎。子曰：不知也。又問子曰：由也，千乘去聲之國，可使治其賦也，不知其仁也。求也，何如？子曰：求也，千室之邑，百乘之家，可使爲之宰也，不知其仁也。赤也，何如？子曰：赤也，束帶立於朝，可使與賓客言也，不知其仁也。

孟武伯問仁，聞聖門以仁爲教也，以仁爲教，由求輩自是不爲不仁，夫子竟不許，何也？仁體純粹，一絲駁

雖雖震世功名都非萬物一體之懷所謂天下國家可均中庸不可能者也涵養熟德性用事卽才是仁氣質用事雖做得煞好亦祇是才然不明言無但云不知何也仁存于心諸子之仁日月至焉難謂絕無但可謂不知耳聖言精確如此

聖人許諸賢與諸賢自許若合券許由治賦卽由自任千乘之國有勇知方者也許求爲宰卽求自任可使足民者也許赤與賓客言卽赤自願學之者也皆不知其仁所以子路不得其死也

爲小相耳

千乘之國詳首篇治訓練也賦軍實也古者以田賦出兵車故謂軍爲賦千室之邑卽百乘家之采地百乘之家諸侯之卿大夫也宰邑宰家臣之長也古者六尺爲步步百爲畝畝百爲夫夫三爲屋屋三爲井四井爲邑一井除公田凡八家四井三十二家爲一邑故五畝之宅二畝半在田二畝半在邑十室小邑千室大邑計田一百二十五井地方十餘里大國百里十分之一也百里之國稱千乘故千室之邑稱百乘孟子云君十卿祿千取百焉以此然未必真有此數天子萬乘九卿則九千乘大國諸侯千乘三卿則

三百乘所餘幾何亦猶千鍾萬鍾之類極言多耳束帶盛服也賓客諸侯之使與言應對也

大戴禮云黃帝黼黻衣大帶帶帶也固結之名束束腰古者服必束帶帶以緇帛爲之有紳垂者曰大帶雖燕居之服亦有之禮服則加革帶以皮爲鞶犀玉金銀或角骨爲鈐帶上飾曰鈐唐柳渾傳玉工爲帝作帶誤毀一鈐

孟武伯子路詳第二篇冉求詳第三篇公西華孔子弟子名赤魯人少孔子四十二歲有容儀子貢曰齊莊而能肅志通而好禮擯相兩君之事爲雅有節是

公西赤之行也

子謂子貢曰女汝與回也孰愈對曰賜也何敢望回回也聞一以知十賜也聞一以知二子曰弗如也吾與女弗如也

子貢以言述聖人學多識而好方人然天資明達自是顏子以下一人顏子深潛如愚乃子貢所少夫子舉回使自方愈勝也子貢依然就聞見多寡比量夫子以其未達而不復舉第云果弗如回也猶恐子貢未信又申之曰非獨汝不如回吾與汝皆不如回也蓋夫子與二三子終日言而回不違如愚夫子祇自

覺其多故云吾亦弗如以絕子貢觀望之路子貢謂不敢望者其聞識之多寡夫子謂弗如者其終日不違默識無言者也故自明亦曰吾有知乎哉無知也有鄙夫問於我空空如也他日語賜曰汝以予爲多學而識之者與非也予一以貫之則豈知二知十較多少之謂乎朱子曲爲之解以附會所謂格物致知之學于聖人妙語辜負陸子靜識此意包氏解其辭不達其旨

字書十合一爲士以聞一知十會意也當時子貢材辨英華陵顏子之上時論或謂子貢勝顏子子貢或

亦自謂過之聖人衡鑒不爽每以回賜相提論所以
裁其過補其短也佛書言阿難以多聞染魔惠能不
知書掩過神秀皆蹈襲此意解者避不肯作此解所
謂割聖教以奉浮屠也

宰予晝寢子曰朽木不可雕也糞土之牆不可朽烏也
於予與何誅子曰始吾於人也聽其言而信其行今吾
於人也聽其言而觀其行於予與改是

學者瞬有存息有養寢卽是學夙興夜寐猶懼宴安
易荒白晝而寢則昏佚之氣勝清明之志銷故曰朽
木言其志頹也曰糞土言其質濁也雕刻也朽圻通

淫飾也志氣昏惰則教無所加聖人通晝夜而知莊
生謂真人其寢不夢清明之至也禮君子晝不居內
晝居于內問其疾可也非疾而晝寢學問道德一切
俱廢尤甚于旦晝營營牯之反覆者故夫子甚責焉
誅責也何誅言不勝責也聽言觀行謂宰我平日善
言德行信以爲善學今殊不然蓋功莫大于克勤而
志莫惰于好寢君子終日乾乾夕猶惕若而沉于晝
寢則學益荒宜聖人之深責之也司馬遷作史記遂
謂宰我與田常作亂亦以此而卒能爲死義之士者
非聖教振作之功與

卧曰寢寢者侵也魄拚氣陰侵陽也陰陽晝夜之相
代常耳當晝陽明用事而受陰剝昏然如行尸走肉
道家所忌故無疾而寢曰睡于文从目垂聲但垂其
目而神不憤也有疾而寢曰困于文从木在口困生
氣囚閉是謂尸寢惟聖人寢不尸夜猶然而況晝乎
晝而寢所以謂之糞朽也

宰予字子我魯人仕于齊田常弑簡公宰予死之史
記李斯傳云田常爲齊簡公臣下得百姓上得羣臣
陰取齊國殺宰予以庭

子曰吾未見剛者或對曰申枨枨子曰枨也慾焉得剛

剛是人心乾健之神天道所以時行物生亘古常運
惟其虛也人得之爲道心全體大虛獨往獨來浩然
常伸于萬物之上曰剛私欲曰慾可欲曰善可欲無
心而私慾有心恒人于隱微中一私牽累則精明果
敢之氣銷而俯仰愧怍頽憊不振從古英雄之氣蓋
世而獨方寸地未洒然則雖功名震耀盡屬虛矯神
龍上下九天呼吸風雲豈不矯然但有慾則人得拳
而烹之男子堂堂七尺中無所欲雖綽約如處子而
爲天行之健有所欲雖强梁如賁育而化爲繞指
昔子路問强夫子首舉南方寬柔以教剛非强梁云

爾易象奇體圓而陽爲剛偶體方而陰反柔天下之
至剛不在堅稜而反在圓融形所以易毀神所以常
存也神清形濁陰慘陽舒無欲則清虛悅樂元氣周
流自強不息故天下之至剛者是天下之至和順從
容者也世儒以堅強不屈爲解以柔道讓佛老以強
直當聖學愚觀易自乾坤而下比小畜履泰否同人
大有皆用柔則效乃知聖人所謂剛者和順于道德
而理于義非堅強不屈之謂也堅強不屈是告子之
學學術一差作用遂乖執己自信動與時迕夫子所
以謂好剛不好學其敝也狂豈肯以未見爲歎乎

申枏弟子姓名魯人字子周家語有申續字周史記
有申黨或作棠亦字周卽申枏枏與棠聲近若村父
之於傖父也

子貢曰我不欲人之加諸我也吾亦欲無加諸人子曰
賜也非爾所及也

行恕是心上事在默識躬行子貢非疑非問第謫量
欲如此耳欲無加人本虛口說欲無加人虛而又虛
他日問君子子曰君子先行其言而後從之子貢一
生病痛未行先言有志行仁向人已聞頭直下
擔承抵憑口說如匪行邁謀是用不得于道故夫子

抑之曰。賜也非爾所及也。蓋激勵之辭。其實行恕亦子貢所及。但空言則無濟。他日問一言終身行之者。子云。己所不欲。勿施於人。語以所及也。聖教隨機善誘。不爲典要。解者不達。妄謂無字是自然。所以難及其迂鑿可笑。讀論語不向此等處玩味。便與諸子文字一般。

子貢曰。夫子之文章。可得而聞也。夫子之言性與天道。不可得而聞也。

文章性命非兩物。在天爲道。在人爲性。性命宣著爲文章。夫子之文章。卽六經雅言之訓。故云可得而聞。

性與天道不越所可聞之中。祇因學者將作文章理會。故但聞夫子言文章。不曾聞夫子言性命。蓋下學可以言傳。上達不可以言顯。故有得不得之疑。性與天道曰言。文章不曰言者。文章卽言也。聞生于耳。見生于目。有形則見。無形但聞。聞如朝聞道。四十五十無聞之聞。文章猶可聞。性道無聲。其聞亦不可得矣。故聞文章以口耳。聞性命非以口耳。子貢前此聞而無得。得亦只認作文章。至是始覺卽是性命。謬云早知燈是火。飯熟已多時。子貢于今始信燈是火也。聞與不聞。總由學者。誰禁之不得聞。誰使之得聞。悟與

未悟耳。非關聖人言與不言也。朱註謂教不躐等。良是。謂子貢至是始聞夫子言性命。非也。子云天何言哉。四時行百物生。向子貢言之。下學而上達。知我其天。亦向子貢言之。一部論語字字性命。人人共聞。豈得謂夫子不言。子貢創聞乎。讀論語若死煞。如朱註只似嚼蠟而已。

日月星辰山河草木天地之文章也。易書詩禮春秋聖人之文章也。天地之文章萬物資生。聖人之文章世教倚賴。倚賴卽是性命。資生卽是化育。非離日月星辰外別有造化。離六經外別有性道也。如一部禮

書四十九篇皆性命之文章。世儒擇取中庸大學兩篇單傳。便是分文章性命爲二。今古同病。中庸大學以文章譚性命。論語不譚性命。渾是性命。後世離文章單言性命。如理學之家。與禪宗何別。離性命單言文章。如聲音辭賦之家。事不關理。言不根心。巧舌綺語。浮榮糟粕而已。故星家云。文昌與司命同宮。蓋造化之精神。卽文章。聖人之文章。卽性命。性命在文章內。如滋味在飲食內。知味者自辨。不知味終不可得而聞也。

謂子貢無所得乎。聖教關鍵實是如此。文章與性道。

明是多學與一貫下學而上達之分段謂有所得
不合離文章別言性道文章可言性與天道那可言
蓋代爲未聞者分疏則可耳檢點二十篇中子所雅
言惟孝弟忠信禮樂言行政學居多性與天道實是
罕言聖門教學之法與不可使知之意兩語道破足
令耳食者深思其于無行不與之妙縱未全體會面
儻所謂億則屢中者與

子路有聞未之能行唯恐有聞

子路兼人夫子所以有退之之教也前輩看作有
世師未然子云多聞闕疑多見闕殆必然之理也非

禮之禮非義之義大人弗爲世間嘉言善行儘多那得不顧安否輒憑耳目見聞便要依倣行其進銳者其退速學問之忌也故子云有父兄在如之何其聞斯行之一片好善之心自不可及一段偏銳之氣往往過當君子深造以道欲其自得之者不如此此章形容躁率之勇學問之病朱子謂子路善用其勇殊未然

顏子語之不惰欲罷不能在上用功如天行之健浸進不已子路聞之斯行唯恐有聞在事上用功如疾走逐日氣力匱乏終不可及天下義理無窮祇信

耳目依樣葫蘆豈免差謬子路行有餘而知不足夫子於子路往往教之知正以此

子貢問曰孔文子何以謂之文也子曰敏而好學不恥下問是以謂之文也

虞舜大聖惟好問顏子大賢惟好學孔國論人品不在賢大夫之列其學問亦非道德之真但知好學知下問亦無忝於一善之名借以勉勵子貢耳蓋人性敏多不好學位高多恥下問文子敏而學亦爲好矣貴而下問又能謙矣異于世之固陋蠢悍者諡爲文非無因是以二字爲解嘲與可以爲文語別論者執

大叔疾之事按圉生平聖人心同天地隨事答問權宜可否無爲刻核也子貢名賢圉所不齒而好學下問其所短夫子砥礪羣賢往往似此

孔文子衛大夫卽仲叔圉初文子使大叔疾出其妻而以女孔姑妻之疾私于先妻之娣圉奪其女歸疾遂奔宋衛人立其弟遺文子又以孔姑室遺其爲人如此○方文子之將攻大叔也訪于仲尼仲尼曰胡簋之事則嘗學之甲兵之事未之聞也退命駕行曰鳥則擇木木豈能擇鳥文子遽止之曰圉豈敢度其私訪衛國之難也

子謂子產有君子之道四焉其行已也恭其事上也敬其養民也惠其使民也義

春秋諸大夫惟子產氣象近道恭敬惠義四者是春秋諸大夫所未嘗講也人臣格君行已最先列國卿相多驕侈而鄭宗室尤甚子產亦公族而能退然有恭遜之風觀其不毀鄉校曰我聞忠以損怨不聞作威以防怨所善者吾行之所惡者吾改之是吾師也此其反躬虛己受言納善其小心恪恭可知也爲人根本旣好故事上使下衆皆悅服而志得行歷仕簡定獻聲四公相鄭四十餘年始則強宗爭權互相誅

殺外則晉楚之兵歲至城下從容幹旋綽有次第內除稔惡以安餘黨子南逐子誓死而大姓帖服講信脩睦事大有禮而不苟徇其欲故終其世免于侵陵而反弱爲強功在社稷而能小心謹慎始終一節險夷一心其敬上可知也使民養民惠義相資養不能使則姑息媮安不可以爲國義而不惠則民不見德而祇見勞非所以重國本也鄭國區區介于晉楚聘享歲幣取之民戰守征調資之民苟不休養于平日則力竭而無以待使不能率作于臨事則令不行而祇以養安故二者相資也左傳謂田有封洫廬井有

伍都鄙有章上下有服忠儉者與之泰侈者斃之皆
所謂惠義并行也而子產之治主於惠必無虐使之
令其奔走強鄰用民之力誠非得已民亦諒其心之
惠而不辭其使之勞故曰義也或專作教民解夫子
謂子產爲衆人之母正以其能養而不能教也

君子備道全美無所不有有四卽是一隅之道恭敬
惠義大美也四其枚數猶是一節之恭敬一節之惠
義聖人言道大小因量文王不顯曰文孔圉學問亦
曰文舜無爲曰恭己文王爲臣曰止敬子產兼之亦
曰恭敬道體無方聖言不爲典要與拘儒語盡成紕

漏矣

公孫僑鄭宗室大夫字子產穆公之孫公子發之子
公子之子曰公孫因氏焉子發字子國以王父字爲
氏故又稱國氏子產爲人仁愛忠厚孔子過鄭與之
如兄弟初子皮授子產政辭曰國小而偏族大寵多
不可爲也子皮曰虎率以聽誰敢犯從政一年與人
誦之曰取我衣冠而褚之取我田疇而伍之孰殺子
產吾其與之及三年誦之曰我有子弟子產誨之我
有田疇子產殖之子產而死誰其嗣之相鄭一年豎
子不戲狎斑白不提挈二年市不豫賈三年門不夜

關道不拾遺四年田器不歸五年士無尺籍喪期不
令而治子產卒丁壯號哭老人兒啼曰子產去我死
乎民將安歸

子曰晏平仲善與人交久而敬之

凡朋友之釁生于不敬不敬生于久久則狎而玩玩
則侮而成釁故惟久敬爲善交交接遇也齊景公以
魯昭公二十年獵魯郊與晏嬰同適魯問魯禮見孔
子論秦穆公所以霸景公悅後數年孔子適齊景公
欲以尼谿田封孔子晏子阻之孔子反是時魯昭公
之末年孔子與平仲交已十餘年而其分誼落落如

此然則所謂交者亦尋常往來之際而其所謂敬者亦禮貌虛文非有同心莫逆之好也昔臧文仲知柳下惠之賢不與之立夫子譏其竊位若平仲于夫子其亦可謂竊位者矣在他人責望當若何夫子顧稱其善交其寬于處友如此而平仲所短自可見

晏平仲齊公族大夫名嬰晏桓子弱之子事齊靈公莊公景公知陳氏必有齊國納邑與政乘間從容風議時有匡救以節儉力行見重於齊爲相食不重肉妾不衣帛一狐裘三十年不更祭先人豚肩不揜豆宅近市湫隘囂塵棧軫之車駕騶馬以朝君語及卽

危言語不及卽危行國有道卽順命無道卽衡命以此三世顯名于諸侯

子曰臧文仲居蔡山節藻梲早梲拙何如其知去聲也

蔡地名產龜大者尺有二寸文仲寶之爲室以居之又美其室以詭之節桑通一名櫨一名栢爾雅栢謂之桑梁上短柱當屋脊者山節雕節爲山形也藻水草梲梁間兩短柱一名侏儒畫藻文于其上也龜本禽魚況復枯骨雖極靡麗何爲所以爲不智也明堂位云山節藻梲天子之廟節大夫爲之僭也禮器云家不藏龜天子諸侯有民社乃藏龜謀大事大夫藏

龜亦僭也。皆不智之事。何如者。言所爲如此。何等乃爲文仲之智乎。蓋古聖人作爲卜筮演造化之數。徵鬼神之情狀。以彰往察來。和順于道德。而理于義也。曲禮曰。卜筮先聖使民信時。日敬鬼神。畏法令。使民決嫌疑。定猶豫。非聖人有疑。而待鬼神決之也。洪範曰。汝有大疑。謀及乃心。謀及卿士。謀及庶人。已乃謀及卜筮。非謂德本不脩。謀猷不審。而一切倚仗鬼神也。臧文仲聽魯國之政。而以智聞。夫智者務民義遠。鬼神行所無事。民情物理了然于心目。然後可居高位。斷大謀。決大疑。今祇依憑鬼神。微靈于恍惚。何以

弼謨定國稱爲執政乎

臧孫辰魯大夫公族也孝公生僖伯彊字子臧辰其曾孫以王父字爲臧氏魯莊公末年與聞國政至文公朝前後執政四十餘年當世以爲賢夫子每短之家語冉求曰昔臧文仲知魯國之政立言垂法于今不忘可謂智矣子曰臧文仲安知禮夏父弗綦逆祀而不止燔柴于竈以祀焉夫竈者老婦之所以祭盛于甕尊于瓶非所柴也左傳仲尼云臧文仲不仁者三不智者三下展禽廢六闢妾織蒲三不仁也作虛器縱逆祀祀爰居三不智也○說苑孔子問漆雕馬

人曰子事萊文仲武仲孺子容三大夫者孰賢對曰
臧氏家有龜名蔡文仲三年爲一兆武仲三年爲二
兆孺子容三年爲三兆馬人見之若三大夫之賢不
賢馬人不識也孔子曰君子哉漆雕氏之子其言人
之美也隱而顯其言人之過也微而著智不能及明
不能見得無數卜乎○按左傳臧武仲得罪出奔邾
請立後致大蔡于魯後其孫昭伯如晉弟臧會又竊
其實龜僂句以上吉及季平子立會會曰僂句不余
欺註云僂句實龜所出地名然則臧氏有二實龜一
蔡一僂句也

周禮龜人掌六龜。天地、東西南北之屬，各有名物，以其方色與其體辨之。大卜掌三兆之法：一曰玉兆，二曰瓦兆，三曰原兆，以邦事作龜之八命：一曰征，二曰象，三曰與，四曰謀，五曰果，六曰至，七曰雨，八曰瘳。占人掌三龜視吉凶：君占體，大夫占色，史占墨，卜人占拆。又卜人掌三龜之四兆：一曰方兆，二曰功兆，三曰義兆，四曰弓兆。揚火作龜，致其墨，謂以墨畫其灼處也。董氏掌三焦契：凡卜以火爇焦，吹其煖契以授卜師。乾煇曰：焦，煖契，謂以荆杖削銳如刀，以燃火，卽士喪禮所謂楚煇也。灼其墨處，成裂文曰兆。○逸禮云：天

子龜凡二寸。諸侯八寸。大夫六寸。士民四寸。龜者陰
蟲之老。老者先知。故舉事必考焉。漢書云。元龜爲祭
長尺二寸。非四民所得居。公龜九寸。侯龜七寸。子男
龜五寸。凡龜以徑尺爲寶。諸侯以守國。○論衡子路
問孔子曰。猪肩羊腓可以得兆。翟韋羹毛可以得數。
何必著龜。孔子曰。不然。蓋取其名也。著之言耆也。龜
之言舊也。明狐疑之事。當問耆舊也。

子張問曰。令尹子文三仕爲令尹。無喜色。三已之。無愠
色。舊令尹之政。必以告新令尹。何如。子曰。忠矣。曰。仁矣。
平曰。果知焉得仁。崔子弑齊君。陳文子有馬十乘。棄而

至於他邦則曰猶吾大夫崔子也違之之一邦則
又曰猶吾大夫崔子也違之何如子曰清矣曰仁矣乎
曰未知焉得仁

令尹楚卿號已去也舊令尹卽子文新令尹代子文
者也舊政必告慮其未曉也四馬曰乘十乘四匹
也忠實也清潔也夫道一而已仁知與忠清非二也
易曰知者見之謂之知仁者見之謂之仁知及之仁
能守之則忠清皆仁知矣然人品制行不同以所志
所習異故君子喻於義小人喻於利皆由所志與所
習陸子靜言之詳矣所喻在此卽爲知子云知德者

鮮百姓日用而不知知之斯好之好之斯樂之知之
斯利之利之斯安之仁卽是心知卽心之神生生惺
惺其幾非二達德先知後仁仁則未有不知不知則
未有能仁者此喻與不喻之分也春秋諸大夫志于
功利而楚令尹子文齊陳文子行事偶合乎忠清苟
心喻于忠喻于清則知矣知則其仁可幾也但二子
初未嘗有學問涵養之素而勉強激勵于一旦與百
姓日用不知等終非其心之所喻則不可謂之利仁
未利于仁不可謂知知未及之焉能守之仁未利之
焉能安之故曰未知焉得仁春秋諸大夫功名富貴

喪其守忠清如二子者可以爲難矣。若夫終食不違之謂仁。豈徇外近名負偶儻之奇者。可冒昧當之乎。故令尹之貴可辭。十乘之富可捨。使方寸地未能惺然。猶是利害得喪茫昧之境。是以由求公西之徒。日從事于仁。而幾微隱伏。操舍出入之介未了然。夫子猶以爲日月之至。與其才不與其仁。今不輕許二大夫者。亦以深醒子張也。張也堂堂神明未免外鶩。故借此覺之。或疑行如二子。猶曰未仁。觀過及知仁。何也。曰過則真性迫而天理見。忠清則美行可以脩飾。禮云與仁同功。其仁未可知。此也。

忠者念頭果確猶忠信之忠當榮辱得喪之際堅定
不易不喜亦不愠舊政告新令尹皆本不愠來告處
見心直卽是忠與忠君別清者高曠絕俗疾惡如仇
若將浼已也忠如告子之不動心由氣強得清如陳
仲子優爲之由氣高得皆非庸品其實刻勵太甚於
精義窮理涵養體驗之功疎可謂美行不可當問學
問學必致知由問學致知入爲真得由氣鬼偶合多
偏蔽故曰知德者鮮百姓日用而不知彼未嘗見道
猶不處仁焉得知云爾非謂人不知彼也未知與不
知語別焉得仁與不知其仁語亦別不知其仁仁向

不可知也焉得仁者全不許之豈以我未知而遂全不許之非聖人語

凡聖人答問權宜兩端道無常主學者貴參伍以會其通如管仲與令尹子文陳文子其心畧同二子論心則不許其仁管仲論事則亟稱其仁何也仁合外內之道也子路于管仲因心并棄其事故夫子許其事子張于二子因事并信其心故夫子抑其心參伍而觀仁之全體可識若夫及門之士亦不輕許其仁者豈由赤之事心反不及管仲乎蓋論人貴恕論道貴精責衆人則器責士君子則備也至于似是而非

如微生高之媚俗非直也。臧文仲之機變非知也。則各指其事之近且顯者破之。季文子三思無一可者則微辭諷之。學問士君子之先務。雖孔文子之碌碌不奪其文。久敬全交之要道。以晏平仲之功名獨取其交。因物權衡各調其適。學者會通則無往不與道合。此章論忠清而進以智仁。非專爲譏刺二子也。朱子謂子文相楚無非僭。王猾夏之事。文子事齊失正。君討賊之義。又不數載。歲反齊。不仁可見。此胡安國說春秋之例。以解論語。愈爲不合。楚僭王則有之。何獨責子文。楚以夷猾夏。漢儒之夢語。使文子道能正。

君力能討賊何至棄家逃走事定反國亦自人情朱
說迂闊難行論語論事合人情論道合天理意無先
主言無成跡因事答問以折于中非專爲譏評人短
長也朱子謂公治長一篇專論古今人物賢否得失
爲格物窮理之一端遂使各章意味淺率豈但失聖
人微婉之旨且使學者襲謬專攻人短長刻薄之風
動借口春秋夫春秋聖人忠厚委蛇之至焉可誣也
又云多子貢之徒所記無端株累與作詩序謬同
令尹卽大宰左傳宣公十二年爲敖爲宰宰者割正
之名尹正也割也曲禮脯曰尹祭割肉方正乾爲脯

以祭也。故膳夫亦曰宰夫子文。姓闕。名穀。於菟。按左傳。若敖娶于邲。生闕伯比。若敖卒。伯比從其母畜于母家。私于邲女生子文。邲夫人使棄諸夢中。虎乳。遂收之。楚人謂乳爲穀。謂虎爲於菟。遂以名。楚成王時。子文代子元爲令尹。又舉子玉爲令尹。時楚日彊。大伐隨。伐鄭。滅弦。滅黃。多子文之功。楚策莫敖子華云。昔子文緇帛之衣。以朝。鹿裘以處。未明而立。子朝日晦而歸。食朝不謀。夕無一日之積。彼廉其爵。貧其身。以愛社稷者。令尹子文也。

崔子齊大夫名杼。齊君莊公名光。靈公子。旣立。爲太

子靈公欲立嬖子牙。徙光于外。公疾。崔杼迎光立之。在位六年。崔杼取棠公寡妻姜氏美。而莊公通焉。數如崔氏。杼稱疾不朝。公往問之。因從姜氏。杼伏甲弑公。晏嬰入。枕公尸哭。三踊而出。齊太史執簡書曰。崔杼弑君。杼殺之。其弟復書。復殺之。少弟復書。杼乃舍之。遂立莊公異母弟杵臼。是爲景公。與慶封爲左右相。棠姜生子明。與先妻二子崔成。崔疆。構。慶封乘閒掩襲杼家。盡殺之。杼窮亦自殺。

陳文子名須無。姓田氏。陳敬仲完之孫。陳完奔齊。改姓田氏。三傳爲文子。事莊公。文子生桓子無宇。無宇

生釐子陳乞事景公。乞生陳恒遂弑簡公。○按周禮校人職家馬四閑謂卿大夫有采地皆畜馬以一良三駑之數計之家馬凡八百六十四匹詳第十六篇而陳文子亦大夫止馬四十匹輒云富矣周禮難盡據也如云無食邑者無馬春秋大夫誰無食邑者乎使馬皆如數則大國三卿共馬十二閑可比天子君馬猶不與百里之封雖芻牧不給矣況牧人之多與他經費乎

季文子三思而後行子聞之曰再斯可矣

季文子季孫行父季友之孫歷相三君左傳稱其家

無衣帛之妾。食粟之馬。無藏金玉。無重器。其清慎可知。故當時人稱爲三思而後行。三思者。熟慮審處。不一之辭。子聞之。聞于人也。再。重也。再三。思恨少也。書云。思曰睿。睿作聖。子云。君子有九思。有弗思。思之弗得。弗措。孟子云。思則得之。不思則不得。管仲亦云。思之思之。又重思之。思之不通。鬼神將通之。三思後行。所謂慮善以動。動罔不臧。文子苟能然。何行之不善。夷考其行。有大不然者。方宣公之謀殺道而納賂于齊也。東門襄仲實主其事。而行父與焉。爲之再如齊。是黨惡也。及事成。宣公立。寵任襄仲。貴其子歸父。歸

交與宣公謀去季氏。未成而宣公薨。行父挾私忿與
臧孫共逐東門氏。絕其宗。魯人憐之。季氏之弱。公室
自行父始矣。春秋無王。而魯以諸侯僭分。過于晉楚。
行父不能匡正。而又從臧氏之爲。立武宮。比周世室。脩
僖廟。請于天子。作魯頌。頌僖公功德。起廟樂。上援后
稷。下暨大王。文武郊天。禘祖。誇誕無稽。故夫子刪詩。
正樂存魯。頌于商周之間。而喟然歎曰。一言以蔽之。
曰。思無邪。蓋罪行父之不正也。與譏再思意同。此其
行事過當。豈三思者所宜有。故諷之曰。未之思也。再
三思則可矣。聖言微婉。世儒祇拘三兩作解。謂嫌其

多思如對癡人前說夢矣

子曰甯武子邦有道則知去聲邦無道則愚其知可及也其愚不可及也

安寧無事出入諷議則聰明材辨可展利用智流離患難之秋聰明材辨展措不給惟宜老成持重沈晦艱貞寧木勿華寧拙勿巧寧遲鈍養銳勿儼捷輕率乃可以涉風波歷辛苦故利用愚無事之日非無智士而機變小慧濫竽不分時不關生死事不臨利害得亦可失亦可突梯脂韋遷就功名往往倖成故曰可及也若夫無道之愚從萬死一生中旋乾轉坤必

有金石不磨之肝膽山岳不動之力量萬死一生之
氣槩千鈞一發之機權乃克有濟不韜光不能識時
不忍辱不能免患不盡黜其智巧算計不能擇死輕
生故曰不可及也

甯俞衛大夫諡武甯莊子速之子甯殖之祖父也有
道謂衛文公之世及成公未失國以前國家無事時
甯莊子尚在至魯僖公二十六年公會衛甯速盟于
向則衛成公立之元年也父子同朝春秋諸大夫多
有之無道謂成公三年衛從于楚晉人敗楚師于城
濮成公懼而出奔晉使衛大夫元咺奉成公弟叔武

守國。咺子角從于成公。公殺之。未幾成公入。先驅者射殺。叔武元咺奔晉。與公訟。武子爲輔。鍼莊子爲坐士。榮爲大士。衛侯不勝。晉殺士榮。則鍼莊子謂甯俞忠。免之。執衛侯歸于京師。置諸深室。甯武子職納橐餠。主進衣服飲食之事焉。晉使醫衍酖衛侯。俞貨衍薄其酖。得不死。因魯侯納玉于王。與晉侯各十穀。角玉雙曰穀乃釋衛侯。衛侯被執三年。衛諸臣畏晉散去。獨武子周旋不避。卒以脫君于危。故天子以知諷衛諸臣。而以愚狀武子。知愚兩者。就世情規避。擔任兩等人立名。寓美刺之義。一曰可及。一曰不可及者。乃其工于

謀身不可及者正其拙于自謀聖言微婉可思

左傳文公三年衛侯使甯俞來聘公與之宴爲賦湛
露及彤弓不辭又不答賦使行人私焉對曰臣以爲
肄業及之也昔諸侯朝正于王王宴樂之於是乎賦
湛露則天子當陽諸侯用命也諸侯敵王所愾而獻
其功王於是乎賜之彤弓一彤矢百玃弓矢千以覺
報宴今陪臣來繼舊好君辱貺之其敢干大禮以自
取戾觀于此其人識度過魯諸臣遠矣

子來陳曰歸與子歸與吾黨之小子狂簡斐然成章不
知所以裁之

子在陳當阨時也。歸與者。道不行而思歸之辭。吾黨魯國鄉黨也。小子。門人也。狂簡。高曠直率也。斐然。文章之貌。成章。謂材具完美也。以裁。以道裁割使成器適用也。蓋道旣不行。歸而造就門人。付託于將來也。吾夫子爲此一脉之傳。可謂良工苦心。自昔堯舜禹湯文武周公列聖。皆以此道親見于身。其自爲之也易。吾夫子不得大行。而以此道託諸後其代之也難。故其苦心焦慮。百倍堯舜諸聖矣。何者。教法難傳。學人難得。何謂教法難傳。語過高。則于事物不涉。語過卑。則于性命不涉。幾經睿思。繞道個下學而上達。下

學是從人倫日用父子君臣夫婦兄弟朋友尋常守理便是性命田地會者一通百徹自然上達不會者倣繩墨而行亦不至誤天下蒼生直到今日以迄千萬世後天地不毀此教不毀是吾夫子開示之功也何謂學人難得世間下流凡品醉生夢死無數稍知來學高低不等低者出口入耳守定糟梟全無靈通透脫之見將此道訛傳低假焉能上達高者天生個儼恣意馳騁不就繩墨將世上名物都作塵網窠臼人不肯下學須是天資聰明又性地篤實中行君子人任此事而百千億萬中不可得一然則道將

終于無傳乎不得已于兩等中遷就仍是高者可喜
亦是高者可憂低者吾道託他傳不得世教亦因他
壞不得高者若不裁翦任其放蕩流弊不可言若裁
翦成力量鴻鉅真堪付託緣他胸中蚤見得一段光
景動稱天地動稱帝王不屑近功小利是名狂簡言
其志狂大而行簡畧也其狂簡又非有邊無中口在
簡而心卑瑣暫時狂簡而久後卑瑣者也實是天生
成高明體段立志爲聖賢真自欲爲聖賢口不屑近
小真不屑近小一段清虛廣大之氣英爽特達之材
渾是聖賢胚胎可觀可度是曰斐然不憂他上達一

半。正憂他下學一半。所以欲裁之。蓋士君子既有高明之識。只當用之克己自勝。不當用以助氣長傲。當以之容民蓄衆。不當以之輕世陵物。有近道之資。而任放自用。老莊瞿曇氏所以得罪于聖人也。故君子極高明而道中庸。君子之中庸也。君子而時中。小人之中庸也。小人而無忌憚也。聖人教人。不言性命。罕言仁。中人以下。不可語上。民可使由之。不可使知之。此也。不成材曰章。斐然成章。言材具可觀也。學問之功未盡。故曰不知所以裁之。非全未嘗學也。

陳國。媯姓。侯爵。虞舜之後。有虞闕父者。爲武王陶正。

武王封其子滿于陳。是爲胡公。以奉舜祀。都宛丘。卽
今河南開封府陳州是也。春秋時。陳蔡皆楚屬。後遂
滅于楚。夫子以魯定公十四年。爲魯司寇攝相。時年
五十有六。或云定公十二年也。齊人歸女樂。夫子遂
去魯適衛。明年去衛。將遂適陳。過匡。有匡人之難。反
衛。居頃之。去。曹適宋。遇桓魋之難。去。適鄭。乃至陳。居
陳三年。晉楚吳爭伐陳。夫子去。反衛。過蒲。蒲公叔氏
作亂。止夫子。旣解去。居于衛頃之。復如陳。時年六十
矣。明年自陳遷蔡。明年自蔡如葉。又自葉反蔡。居三
年。吳伐陳。楚昭王軍于城父。救陳。聞夫子在陳。蔡間。

使人聘陳蔡大夫謀止之以其徒圍之絕糧七日子貢如楚昭王興師迎之圍解將封夫子以書社地七百令尹子西不可是年秋昭王卒夫子遂反衛時魯哀公四年也至哀公十有一年季康子以幣迎夫子還魯年六十有八矣去魯凡十有五年居陳蔡強半夫以區區彈丸破敗之餘不可爲國而何爲是栖栖者意在楚也思歸之嘆疑當昭王旣沒之後齊魯旣不可有爲晉將亡又不可往惟楚地廣民衆天運將在東南聖人蓋先知之其微意頗見于詩書春秋而世儒誤于春秋夷楚之說轉相訛承使聖意數千年

不白信乎窮經之難也

子曰伯夷叔齊不念舊惡怨是用希

不念舊惡取其自新也怨人怨之也用猶以也希少也惡惡人之恒情我苟爲惡人將惡我士君子先以責人之心責已砥行礪節如古伯夷叔齊孱然無容訾議而又以寬恕之心待天下之不肖雖惡人可惡能改卽止不追往不藏怒如此庶乎人亦少怨之今人好攻人惡而已未必如夷齊疾不仁而已甚豈遠怨之道故曰寬則得衆君子躬自厚而薄責人吾非斯人之徒與而誰與學問不離涉世寡尤遠怨聖人

每諄諄焉。儒者動以任怨爲能事。非至當之論。

此章非專美夷齊也。夷齊不念舊惡之事不可考。但觀不立於惡人之朝。不與惡人言。其冠不正。望望然去之之類。疾惡亦不爲不甚矣。不食周粟。餓於首陽之下。亦未忘適莫者也。當時惡人不改。二子未必遂忘。惟能自新者。不念之。故曰。怨希也。君子善善長而惡惡短。雖清操如二子。亦不當以已槩人。況萬萬不如。而徒責人無已。有不怨集厥躬者乎。

伯夷。叔齊。孤竹國君之二子。墨姓。或作默。或云怡姓。伯。兄也。叔。弟也。夷。齊。諡也。伯名允。字公信。長子也。叔。

名智字公達適子也或云有仲名憑字伯遼夷與齊讓國俱逃居于北海之濱聞文王興西歸至岐陽而文王沒及武王伐紂二子叩馬諫及商亡退而隱于首陽山不受周祿採薇而食有婦人謂之曰不食周粟而食周之草木遂餓以死孤竹國古營州地秦漢爲遼西右北平盧龍等處今北直隸永平府灤州是也府城西北雙子山有長君塚團子山有次君塚馬鞍山有少君塚或曰國人立其中子卽次君也

子曰孰謂微生高直或乞醯

希

焉乞諸其鄰而與之

微生姓高名魯人也當時以直稱乞求也醯醋也人

乞已醯已更轉乞于人以應之其委曲徇人
常細事未關大節何至毛舉以槩生平蓋惟其事小
而以周旋世情愈近自然而人不覺私恩小惠最易
結市井鄉里之心自古姦雄欺世多因米鹽瑣屑蠱
惑愚俗馴至挾詐彌天牢不可破田氏之竊齊以粟
張魯之得蜀以米皆此類今世縉紳學士爲乞醯之
類者不少惟聖人爲能知微就尋常曖昧處破其機
心維世之功大矣五霸功名亦是一點乞醯之心敷
衍出不可不察也

子曰巧言令色足

直去聲

恭左丘明恥之丘亦恥之匿怨

而友其人左丘明恥之丘亦恥之

足恭過爲恭也巧言令色足恭側媚之狀也隱匿其
怨而陽友其人姦險之狀也二者皆機詐之事世道
民風若此五霸之習氣也人之生也直士君子光明
正大無受爾汝無爲穿窬此羞惡之良心如鬼如域
爲機變之巧者無所用恥焉君子所共惡也左丘明
魯大史史明是非昭勸戒舉良史所恥以表公非也
丘亦恥之猶竊取之意所以因魯史而作春秋也故
曰色厲內荏譬諸小人其猶穿窬之盜蓋深有慨于
當時司世教者

左丘複姓名春秋世之賢者於夫子爲先進故夫子自名以附之司馬遷班固劉歆謂左丘明爲魯大史春秋左傳卽其所作魯史也於聖人爲同心之言準其凡例解經及不合寧背經不敢背左傳春秋之訛自此始據夫子此言謂明爲魯大史亦似而謂左傳卽左丘明之史非也蓋後人取舊史薈叢潤色之而託左丘明以傳耳辭人之業于經義原未通曉世儒艷其辭轉相浮慕更不折諸理與聖人之心可嗤也愚于春秋詳之矣

淵季路侍子曰盍各言爾志子路曰願車馬衣輕裘

與朋友共敝之而無憾。卑顏淵曰：願無伐善，無施勞。子路曰：願聞子之志。子曰：老者安之，朋友信之，少者懷之。卑在尊旁曰侍。盍，何莫也。志者，心之所期向。願，卽志也。衣輕裘，衣裘以輕爲美也。伐，害也。家語：顏回問小人子云：毀人之善以爲辨，卽伐善之意。施加也。勞重役也。高年曰老。謂凡老者也。同儕曰朋友。凡年相若者也。童穉曰少。凡幼弱者也。安，奉養也。飽煖之類。信，倚任也。懷，擁護也。凡聖賢學業先行後言，未行先言者，惟志爲然。志不可僞。志定而學，則忠信可以崇德。學無志，縱多見多聞，如無根之木，不可植也。故學莫

先于立志志莫大于爲仁聖學以仁爲宗仁以公爲體志有廣狹聖賢之量攸分子路輕財重誼超然市利之外但未免著意氣仗財貨以行其志則疎矣顏子好善而愛人欲惡當理人已大同正是學問中日子路公財止于朋友顏子公好惡通乎人已爲仁之大者夫子如天覆地載因物付物不費而惠普一腔以散之萬物卷六合以納之一心無內外人已元氣周流是仁之全體也聖賢志願有大小要皆以無私爲仁子路近仁顏淵體仁夫子聖於仁所謂天下歸仁萬物一體也下學而上達中庸之至德皆不越

此佛氏以十方世界爲全身踏襲聖人之意

車馬衣裘共做如六國四豪輩亦能之但子路本貧而有志于此視車馬衣服爲義理公共之物卽是學問中事四豪輩無志以其長物爲結交之資耳是市利中事前章論忠清未仁亦以此也士有志公物臨財脫然無累甚難夫子謂振也慾焉得剛子路猛決破得一慾字網何物車馬衣裘足挂懷抱其過人遠矣善者人所同好勞者人所同惡無伐善使善人君子長養成就也無施勞使困苦窮民休養安息也善勞人所同有善在己者無戕賊在人者無媚妬勞在

已者自任在人者體卹君子不施其親不施勞也擇
可勞而勞非有心于施也老少朋友不必皆親黨安
信懷普願世人各盡此情匹夫匹婦無有不獲此卽
博濟之仁堯舜猶病天地雖大萬物猶不齊今欲齊
不齊之分使各得其所此量何限此願何窮道愈近
而愈遠事愈易而愈難聖人之夙心聖人亦不可必
得也故曰志而已矣佛氏欲度盡衆生冀此旨
財利人所易私無子路之志則鄙吝之習難銷欲惡
人所難公無顏淵之志則已私之累不克故士不可
以無志若夫老少朋友并育并行踐之則隨分各體

由之則終身不盡所以爲聖學也

何莫之言蓋猶而已之言耳之乎之言諸不來之言
狸彌牟之言木於越之言越句吳之言吳邾婁之言
鄒不可之言不可之言不不之言合二成音梵書安婆讀
此之類或謂華人尚字梵人尚音未盡然也伐訓害
如詩云是謂伐德又云勿剪勿伐孟子云旦旦而伐
皆害意無伐者培植養育成人之美也人之有技媚
嫉以惡之伐善也施訓加如詩云施于中林祭統引
孔悝之銘云以辟之勤大命施于烝彝周禮內宰施
其功事皆加意小司徒辨凡征役之施舍周語云縣

無施舍又曰聖人之施舍也議之施謂加役舍謂免役周公謂魯公君子不施其親謂親者免其征役也與施勞之施正同朱註作張大訓遠矣有善不矜有勞不伐與公人之意不協此章意主行仁子路與夫子所言皆無私之仁豈顏子獨異朋友非同師同道之謂居老少之間年齒相若者也大抵老少朋友三等盡乎人類矣安信懷則人無不得所矣是聖人希天之志也

子曰已矣乎吾未見能見其過而內自訟者也

人心放逸在外殊不自見一念反照皎如白日自己

過失歷歷分明豈容自欺但恒情自見過仍自掩覆
如以薪包火雖從事于學非正本清源之功所貴能
見過者須靈知脉脉自怨自艾徹底汰蕩不容一毫
渣滓如人負冤力求昭雪如雨造對質哀情盡吐如
仇家相見更無縱匿如理官判斷推勘到底是謂自
訟卽顏子有不善未嘗不知知之未嘗復行也此誠
意之學固自難得

子曰十室之邑必有忠信如丘者句焉不如丘之好學
也

人之生也直赤子愛親敬兄純一無僞是謂忠信入

孝出弟謹言慎行是謂好學學以培養忠信忠信爲
爲學之本進德之基雖三家兩鄰必有忠信者但知
誘物化機械鑿其混沌則佻薄之習長而敦厚之意
微是必明善誠身保任此忠信而後可故曰焉不如
丘好學也赤子一段天真本同聖人涵養擴充日新
又新然後聖功成若謂赤子卽便聖人何天下赤子
多而聖人少也在天者不足恃而在人者不失其在
天者乃爲實地謹厚之人不學終成椎魯高明之人
不學流爲放蕩世間惟有學爲要夫子平生謙謙之
至惟好學一事以自任大如仁美如君子以許人惟

好學不輕許蓋聖人以好學爲命脉其學亦非世人
所謂學其好亦非世人所謂好苟有一真能好學之
人卽是一聖人聖人之學較衆人境地不同其學準
爲善之心直與小人志富貴功名之心至誠無厭一
也若謂聖人不學卽是斷絕聖人種子夫子十五至
七十每十年一變步步換進真見得道無盡學無盡
所以爲聖人那得怪世間無好學人也

焉不如猶言何不如朱子謂不成文理改焉字屬上
則上句語不定下句式直任屬下則上句辭決下句
意婉一字之差而意味深淺各別信讀書未可鹵莽

⑤焉與安古字聲近通用猶燕之于晏陰之于闇庵之于弇也安見方六七十卽是焉見焉知來者不如今卽是安知此焉不如卽是安不如